

He Ngohe Aromatawai ā-Roto Mō ngā mahi whakamahere anake

Te Ingoa o te Ngohe: Tōku reo, tōku māpihi maurea

Aronga: Tikanga ā-lwi 1.1A

Paerewa Paetae: Tikanga ā-lwi 1.2

Kaupae: 1

Whiwhinga: 6

He Tohutohu mā te Ākonga

I tēnei ngohe

I tēnei ngohe aromatawai, ko tāu mahi he tūhura i ngā momo take o te wā e pāpā ana ki te reo Māori, waihoki, i ngā rautaki e whanake tonu ai te reo.

Te horopaki

Tōku reo, tōku ohooho

Tōku reo, tōku māpihi maurea

Tōku reo, tōku whakakai mārihi

Ko te reo te tūāpapa o te tangata Māori, te kauwaka o te ahurea Māori, te mauri o te whakaaro Māori, ā, e ora ai te Māori me ora anō hoki te reo. Me aha kia ora tonu ai? Hei tēnei aromatawai, ka whakaatu koe i tō māramatanga ki ngā momo take o te wā e pāpā ana ki tō tātou nei reo rangatira me ngā rautaki e whanake tonu ai te reo.

Ko te hanga o tēnei aromatawai he kōrero, he whakaaturanga rānei i tō māramatanga ki te kaupapa.

Hei mahi

- Rangahaua, whakaraupapahia hoki ngā tātai kōrero o te reo Māori me ngā take i pāpā ki te reo, pērā i:
 - ngā ture
 - ngā here
 - ngā rautaki (whakarauora/tāmi).
- Tūhuratia ētahi take e pāpā nei ki te reo Māori ki te whakaatu i tō māramatanga ki ērā take. He aha ngā take, he aha ōna pānga me ōna whakaawenga ki runga ki te reo. He aha ngā piki me ngā heke o te reo

Māori i roto i te wā? Whakaatuhia tō māramatanga ki tētahi take i tutū ai te pūehu ki te reo Māori.

Koinei ētahi tauira o ētahi take, pai mai, kino mai, e whakaawe ana i te reo hei whakaarotanga māu:

- te wāhi ki te kōhanga reo, ki te kura kaupapa Māori, ki ngā kura ā-iwi, ki ngā wānanga
- te ipurangi me ngā hangarau matihiko
- Whakaata Māori me ngā teihana reo irirangi Māori
- te ako a ngā ākonga katoa o ngā kura katoa o te motu i te reo Māori hei kaupapa ōkawa
- te ako a ngā tāngata katoa o Aotearoa – Māori mai, Tauīwi mai – i te reo Māori
- te hononga pūmau o tētahi tokorua, tētahi ki tētahi
- te whakatupu tamariki, whānau kōrero Māori
- te Kāwanatanga
- Te Taura Whiri i te Reo Māori
- te puoro, te kapa haka
- te kaikiri o te tangata
- te mana o te reo ki waho i te hāpori Māori
- ngā pūnaha whakaū i te Tiriti o Waitangi
- ngā waiaro o te Māori kāore nei e hiahia ki te reo.

Ehara i te mea me ū ki tēnei rārangi nei, he tauira noa iho. Mā te kaiako pea koe e ārahi ki te tautohu i ngā take hira tonu ki tō hapū, ki tō iwi, otirā ki tō taiao.

3. He aha ngā rautaki e ora ai te reo? He aha ngā whakahaerenga i roto i te ao Māori, i roto i tō iwi, i tō hapū, otirā i tō whānau e whakaatu ana i te kaha o te tangata ki te whakarauora i te reo Māori? Tautohungia kia kotahi te rautaki hei tūhura māu. Anei ētahi hei tauira māu.

- ngā kura reo
- te kōhanga reo
- te kura kaupapa Māori
- ngā kaupapa reo ki te marae, ki te hāpori, ki te iwi.

Kia kaha koe ki te titiro ki tō hāpori, ki tō taiao ake, kei reira pea te tino o ngā rautaki hei tūhura māu.

Ngā mahi hei tāpae

Ko tāu mahi, he tuku mai i tētahi kōrero, whakaaturanga rānei. Ko te kounga o ngā ariā matua i tō kōrero te mea nui, ehara kau ana ko te roa. Kei a kōrua ko tō kaiako te tikanga mō te roanga o tō tū.

Kuputaka

pāpā	affect
rautaki	strategy
tātai kōrero	timeline
tautohu	identify
tūhura	explore